

DISSERTATIO INAUGURALIS MEDICA,  
CONTINENS  
**HÆMATOLOGIAM**  
**PHYSICO-MEDICAM.**

*Quam*

AUSPICE DEO PROPITIO,  
*Et Consensu atque Auctoritate Gratiſſæ Facultatis Medicæ,*  
IN ALMA REGIA FRIDERICIANA,

P R Æ S I D E

**DN. D. MICHAELE ALBERTI**

SACR. MAJ. REG. BORUSS. AULICO ET CONSIST. MAGDEB.  
CONSILIARIO, MED. ET PHILOS. NATUR. PROFESSORE  
PUBLICO ORDINARIO, ETC.

DECANO H. T. SPECTATISSIMO;

*Domino Patrono, ac Promotore suo, omni honoris cultu prosequendo,*

**PRO GRADU DOCTORIS**

SUMMISQUE IN MEDICINA HONORIBUS ET PRIVILEGIIS DO  
CTORALIBUS LEGITIME IMPETRANDIS,

horis locoque consuetis

ANNO MDCCXXXVI. D. OCTOBR.

*Publicæ ac placidæ Eruditorum ventilationi subjicere*

R E S P O N D E N S


**HENRICUS KÜNZLINUS,**

VITODURO · HELVETUS.

---

HALÆ MAGDEBURGICÆ,

TYPIS IO. CHRISTIANI HENDELII, ACAD. TYPOGR.







## PROOEMIUM.



Ximia Sanguinis vulgo  
occurrit æstimatio, ut vel ipsis  
brutis illius notatu digna fami-  
liaris sit inspectio & fuga, dum  
varia eorum, ad mactationem  
ductorum, non obscuris indi-  
ciis significant, quod vulpecu-  
lam æsopicam antrum Leonis, morbum simulantis,  
adspicientem, meticulosam atque suspicatem excla-  
masse, fingitur, *vestigia me terrent*: in emblemate hæc  
dicta, ad rem commode adplicari possunt, dum tre-  
mor & stupor quidam in multis animalibus ad san-  
guinis, præc. ab ejusdem speciei alio animali effusi,  
adspectum, observatur: tanto magis in hominibus,  
nisi barbari, rapaces & anthropophagi fuerint, reli-  
giosa & sacra Sanguinis deprehenditur consideratio:  
ob id piaculum fuit, vel primis tantum labris sangui-  
nem degustare, juxta illud LUCANI *lib. 1. pharsal. nullus*



*semel ore receptus pollutas patitur, sanguis mansuescere fauces.* Unde illa sanguinolenta animalia, quasi a reliquo oetu brutorum, velut rapacia, crudelia, immania, & sæva distinguenda, & homines inhumani, sævi, teroces, quippe barbari & reliqua hominum societate excludendi censentur: ille, etiam qui mores humanos, aut mentem humanam immutaverant, & lycanthropi morales facti fuerant talique apodiriosi inversi & transmutati sunt, rapaces, ac sanguinis libidine ardentes Blutgierige, Blutdürstige, vocantur, cujus observationis causam male CASMANNUS in *Psycholog. Part. 2. c. 13. quæst. 8. p. 500. sq. in Spirituum & sanguinis consensum* conjicit. Qualiscunque itaque hæc adhuc naturalis & clandestina sanguinis est veneratio, talis nervus in ipsa notatione illius deprehenditur, dum DIETERICUS in *Fatr. Hippocr. n. 15. p. III.* testatur: *Succi hujus excellentiam eleganter arguit ejus nomen in lingua sancta, dum præter proprium suum nomen* □ *etiam* □ *quod alias fortitudinem significat vocatur. Appellationis rationem assignat Rabbi Abraham in Esaïam, quod sanguis sit fortitudo & vita hominis.* Quam succincta autem hujus nominis notatio est, tam ampla atque multiplex illius significatio & interpretatio existit, ita ut in sacro ac profano, Theologico, Politico, medico &c. usu & sensu varia illius acceptio, interpretatio & applicatio occurrat, quæ ut plurimum memorabilem nervum continet: hinc communis assertio & consultatio est, si quid rude & crudum adhuc est, ut in succum atque sanguinem convertatur: ita Basil. VALENTINI de *Microcosm. & de natural.*



*tural. & supranatural. rebus testatur: rudimentum & nutrimentum in corpore omnium sanguis est: Quoniam itaque animalium sanguifluorum origo vitæ, essentiæ, existentia & virtutis sanguinis apparitionem & motum; interitus vicissim, destructio & corruptio sanguinis quietem, defectum & intimam resolutionem involvit, ideo in Sanguine multa posita fuisse antiquitus supponebatur: hujus animadversionis testis sit RABBI LEO Mutinensis Part. 2. de ritib. Ebr. cap. 7. §. 3. dicens in Semine & Sanguine si non omnia, plurima tamen consistunt: Simile effatum profert SENNERTUS disp. de Sanguine in præfat. ex semine & sanguine parvum id videtur dictu, sed immensum æstimatione est: Nec a veritate discedere videmur, si sub sobria interpretatione asserimus, naturam cum sanguinis genesi & motu vitam exordiri, & cum sanguinis absoluta quiete vitam obsignare: testem hujus meditationis produci-  
mus HARVEJUM Lib. de generat. anim. p. 229. seq. in-  
quentem: sanguis in ovo apparet, antequam corporis quicquam fabricatum conspicitur: Hæc consideratio eximi-  
am sanguini conciliavit æstimationem, dum homo sine illo nec fieri, nec esse, nec existere, nec conser-  
vari potest, quare in illo omnem ferme potestatem naturalem positam esse, multi firmiter & religiose si-  
bi aliisque persuaferant; quid quod veneratio & cul-  
tus illius ampliores fecit progressus, dum non mo-  
do hic celebris humor ad ordinariam vitæ & sanita-  
tis utilitatem necessarius judicatur, sed & ad varios  
arduos morbos excutiendos, sacrificii instar com-  
mendatur, de qua posteriori laude merito valet il-*



IUDARETAEI *Cappadocis Lib. 1. de acutorum & diuturno-  
 rum morborum causis & signis Lib. 1. cap. 4.*, qui nonnul-  
 los vidit, nuper jugulati hominis vulnere phiolam  
 subjicientes, atque inde haustum cruorem bibentes,  
 & indignabundus exclamavit: *o ingentem necessitatem  
 quempiam sustinere, malum malo piaculo depellere*: Ne ve-  
 ro brutinus, neve irrationalis, neque absconditus  
 cultus Sanguinis in hominum mente fluctuet, inter-  
 est maxime non modo physicam illius analyfin &  
 disquisitionem instituere, sed & subinde medicum e-  
 jusdem usum annotare; servata illa cautela, ne tales  
 sanguini tribuamus qualitates, quæ perverso ac con-  
 fuso respectuum & causarum nexui adscribi meren-  
 tur, vel plane imaginariæ & fictitiæ existunt, quibus  
 interdum novitatibus deditus animus, ita tenaciter  
 adhæret, ut Jovem lapidem juraret, fabulam talem  
 veritatem esse: non difficile autem est demonstrare,  
 quod hyperbolice commendatio illa instituta sit: In  
 Medicis enim demonstrationibus non credenda, sed  
 perspicuis rationibus probanda sunt, quæ pro veri-  
 tate assumere sobrius & sincerus requirit intellectus:  
 quis enim illis hieroglyphicis, & ænigmaticis tradi-  
 tionibus de sanguine facile subscribet: haud enim  
 allegorice & obscure de Sanguine medici differere  
 debent, qui rerum physicarum & chymicarum gna-  
 vi, solide & perspicue de subjectis diversis tractare  
 debent: eapropter BAGLIVUS admodum improbat le-  
 pidas assimilationes & valde distantes comparationes  
 in studio veritatis medicæ: neque etiam nonnullæ pa-  
 raphrasticæ sanguinis commendationes multum lu-  
 cis



cis & utilitatis promittunt, quando GALENUS *Lib. 2. de Temperam. cap. 3.* ait, *quod dilectissimus naturæ sit filius, maxime proprius & domesticus sit succus: aut Lib. de curand. rat. per Sangu. miss. cap. 5. est nectar vivificum & primigenium, quo partium omnium robur recreatur, & in quo calor noster perseverantiam obtinet.* Nec silentio prætereunda est antiquissima confusio cum anima & sanguine commissa, qua præstantiam hujus indicaverant quidam gentilium, ita ut animam sanguine lactari, delectari, saginari & nutriri sibi persuaferint *vid. LUCIANUS Tom. I. Opp. in Necyomant. & Charont. simile judicium in Virgilii Lib. 3. æneid. v. 66. suo Commentario p. 319. fert SERVIUS inquires: Lacte corpus nutritus post animæ conjunctionem, & anima sine sanguine nunquam est, quo effuso illa recedit.* Quam pretiosus autem humor sanguis est, quam speciosa etiam de eodem generice conservatur æstimatio, tam clare atque distincte de illo differendum est; Quoniam itaque Sanguinis contemplatio in corpore humano vivo, ad indagationem vitæ naturalis, præsentia animæ in corpore, connexionis & commercii illius cum hoc, præstantia virium naturalium, caloris, coloris & præc. ruboris, sani, ducit, ita negotium quod in sanguinis disquisitionem impenditur, nec otiosum, nec infructuosum erit: Barbaris licet in more positum fuerit, in fœderibus pangendis, mutuum haurire sanguinem *conf. TACITUS Lib. XII. Annalium, Valer. MAXIMUS Lib. XI. Herodotus, Solinus, Pomponius Mela, Lucianus, Athenæus, Fulgosius vid. Camerarius Cent. 1. Opp. Subcis. cap. 6.* Medicis tamen minus religioni ducitur, non modo



do delibare sanguinem, sed & hujus curatiorem scrutationem instituere. Constituimus itaque præsentī Inaugurali Specimine succinctam HÆMATOLOGIAM PHYSICO-MEDICAM exhibere: cui labori ut Benignissimus DEUS Gratia sua præsto sit, devotissimis precibus rogamus.

§. I.

**S**anguinis contemplationem suscipientes & institu-  
entes, ut tituli rationem reddamus, *ne quid nimis*,  
& ultra propositum a nobis desideretur atque ur-  
geatur, necesse erit, ut primo SUBJECTI, deinde  
*prædicati* generalem præmittamus explicationem,  
videlicet ut *Sanguinis* notionem *nominalem* & *realem* tra-  
damus, deinde etiam indicemus, quid de sanguine sensu  
*positivo* & *privativo* annotare aut magis aut minus placeat:  
Brevem nominis indagationem & evolutionem assumen-  
tes, significamus, quod Sanguinis analysis critica & *ety-  
mologica* discrepans apud authores inveniatur, ubi quæ-  
dam derivatio & resolutio magis coacta, alia plus *natura-  
lis*, libera & *formæ* magis conveniens videtur: MARTI-  
NUS in *Lexico tit. Sanguis* ait: ISIDORUS *Lib. 4. Sanguis  
latine vocatur, quod sit suavis, unde & homines, quibus do-  
minatur sanguis, dulces & blandi sunt, id vero remotius est,  
nam sanguinem & suavem voce conciliare velle, nimis  
amplum & diffusum est; omnes enim homines sangui-  
ne instructi, sed non omnes suaves, multo minus dulces,  
sed multi, partim falsi, partim amari, acerbi, austeri,  
mordaces &c. significatu morali sunt, quid quod respe-*  
ctu



Etu physicae analyseos, paucissimorum hominum sanguis  
*temperatus*, nedum quidem *dulcis* & *suavis* existit; (quam-  
 VIS SENNERTUS in *dissert. de Sanguine Sect. dogmat. §. 4. 11.*  
 illum humorem *dulcem* definiverit) propterea de san-  
 guine lactescente, chyloso & dulcescente, mox obser-  
 vationes conscribuntur & tanquam rarum & insolitum  
 quid, divulgantur: merito itaque huc applicare possumus,  
 quæ HIPPOCR. proficitur *Lib. de vet. Medic. §. 24. text. 20.*  
*edit. Lind. inest in homine & amarum & salsum & dulce &*  
*acidum & acerbum & fluidum & alia infinita, omnigenas*  
*qualitates habentia!* &c. ita etiam VERULAMIUS *hisor.*  
*natur. Cent. 6. n. 645. p. 882.* asserit: *omnium animantium*  
*sanguis est salsus*: & hanc salsedinem in consequentibus a  
 dulcedine distinguit: vix etiam multorum assensum ob-  
 tinebit ZACUTUS LUSITANUS, qui in *M. P. H. Lib. 2. hist.*  
*XI. qv. 9. p. 186. a. lit. A. edit. in fol.* sanguini insignem tri-  
 buit dulcedinem. GALENUS tantum dicit *Lib. de atra bile*  
*cap. 2. quod sapore dulcis sit*: pergit porro MARTINUS:  
*etsi græci αἷμα & blandus ab αἷμα ducunt: sed quid in græ-*  
*co est, quod huc spectet? an vult σάειν & ζάειν? Catholicon*  
*ait, vel sanguis dicitur a salio, quod saliat: Scaliger exer-*  
*citatione 325. n. 13. sanguis latinorum prisca vox, quibus ele-*  
*mentis alio utebantur flexu, ad ea designando, quæ ad reli-*  
*gionem pertinerent; sic sagmina, sacrum, sanctum: præter-*  
*ea addit Martinus; vocem hanc primam religiosam esse non*  
*putem: Sanguis est cujus vi ζῶν γῶα membra vivere que-*  
*unt: ζ & σ aliquando permutantur; σάειν γῶα quod servet*  
*membra: ideo Genes. IX, 4. carnem in anima ejus non come-*  
*detis: & hæc derivatio non ita affectata, coacta & remo-*  
*ta esse videtur, quia sanguis saliente motu naturali, sua*



integritate præditus esse debet, dein quoniam illo in corpore hominis conservatio, velut *absoluto* medio necessario, impetratur: *aliam* etymologiam idem Martinus profert, & pergit: *Martinius Simplicius* ait, *forte est Sanguem* (*& inde sanguis*) quod corpus animalis sanciat, i. e. stabiliat, aut ei velut *leges valetudinis rectæ & pravæ* sanciat; nisi sanguis est a *ῥῶς*, quod coccinum & rubrum significat, sicut *Sandyx* & similia quædam a *San* notionem habent. Græcum *αἷμα* refertur ab *αἶδεω*, quod est ardere, & ex ardore rubere: *Blut* a *blühen* florere s. a *βλῦειν* scaturire, viejus floret animal, & ille humor scaturiens est: Aliam sanguinis denominationem *Cælius RHODIGINUS Lect. antiqu. Lib. 3. cap. 12. p. 130. lit. B.* affert: nec illud præteriero in *alexipharmacis Nicandri sanguinem dici ἑλᾶρ*, quoniam *Vere plurimum exundet*: Addimus hisce animadversionibus, quæ *DIETERICUS in Jatræo Hippocr. tit. αἷμα n. 15. p. III.* allegat & indicat, quæ modo superius in procemio annotavimus; annectimus verba *SENNERTI disp. de Sanguine Sectione dogmatica §. 1.* alii sanguinem a sanitate derivant, quia ex hac dijudicari potest, sanguinem purum sincerumque esse in corpore sano: alii *ἀπὸ τῆς αἶδεω* ab incendendo vel adurendo petunt, propter calorem, cujus sanguis fomes est: addit: nos nemini litem movebimus e quacunque etiam origine desumere vocabulum hoc contendat; interim vero grammaticis dabimus commendatam: *WERLOSNIIG curat. vern. autumn. P. 2. cap. 1. p. 432.* refert: *Sangius* a *Ful. Cæs. Scallig.* refertur ad ea designanda, quæ ad religionem pertinent: unde in sacrificiis sanguis dicitur, sanctus, i. e. intemeratus, illibatus, purus. - *Latinis nobilis & ruber ille corporis humor vitæque conservandæ instrumentum audit sanguis, qua-*



*se sanguis a sancio, quod corpus veluti sanciat, i. e. stabiliat.*  
 Nos sanguinem in *abstracto* considerantes, solitariam & *simplicem* illius substantiam advertentes, nec a *saliente* motu, nec a *sanctuario* & sacrificio, nec a *conservatrice* qualitate, nec a *calore* illum derivamus, siquidem omnibus, hisce qualitatibus aliquandiu *carere*, attamen sanguis in sua *essentia* & *formæ* esse potest: *ast nullus sanguis est absque rubore*, quo colore se ab aliis humoribus humani corporis distinguit, ideo omnes *partes sanguiferæ* non pallidæ, *sed rubellæ* sunt: est itaque *inseparabilis* qualitas, *rubor*, qui sanguini vero & *sincero perpetuo* & *semper* adest, licet in uno *subjecto* *floridior*, in alio *obscurior* existat: GORRÆUS in *definitionibus medic. tit. 2. pag. 11. a.* ait: *Sanguis optimus & pulcherrimus multum rubet*: & *p. 10. b.* Hippocrates sanguinem natura *calidum* esse non existimavit, quod in *mortuo animali* calorem non retineat, cum tamen alii humores *temperamentum proprium* etiam post mortem retineant - ex quo apparet in *VIVO animali* *mistum* aliquid esse sanguini, *cujus occasione* *calidus* sit: hoc additamentum illico hic author *spiritum* nominat, nos *generatim Morum* vocamus.


§. II.

Posteaquam nonnullas animadversiones circa *Subjecti*, præsentis thematis, notionem instituimus, in quantum illæ applicationibus & *usibus physico-medice* respondent, ita proximum nunc erit, ut *prædicati* rationem *generalem* reddamus, qualem videlicet tractationem, aut explicationem hac nostra opella de *Sanguine* ex parte promittamus, ex parte intelligamus: etenim *amplifica* Sanguinis est disquisitio, ita ut multi medici satis diffuse de *Sanguine* egerint; ex antiquioribus varios collegerunt ZACUT. LUSITANUS



*M. P. H. Lib. 2. hist. XI. qu. 9. p. 185. b. lit. E. & BAUHINUS Lib. 1. theatr. anatom. c. 44. in fin. conf. Avicenna I. 1. doct. 5. VALLERIOLA Lib. 1. loc. comm. c. 11. CARRERIUS in comm. cap. 2. Joan LUPUS ad Tyron. L. 3. dialog. 2. Georg. a SAA in quæst. de Sanguine, CASMANNUS Psychol. Part. I. cap. 12. qu. 3. SEGARRA, LEMOSIUS, MERCATUS, LAURENTIUS, VEGA, PERAMATUS, VALLESIUS, BRAVO; e propioribus, BARBATUS tr. de Sanguine & Sero, SENNERTUS dissert. de Sangu. & in Epitom. natur. scient. Lib. 8. cap. 2. SANDRIES de statu sanguinis nat. & p. n. SCHNEIDERUS diff. de sanguine, BOHNIUS in Circ. anat. progymn. 13. WEDELIUS in Physiol. VATERUS in Physiol. experiment. CRAANEN tr. de homine cap. 7. p. 161. CHARLETON æcon. animal. KNOBLOCH. disput. 19. SPERLINGIUS institut. phys. Lib. 8. cap. 4. BOYLE in apparatu ad historiam naturalem sanguinis humani & multi alii, communiter autem Epitomatores Medicinæ. Quod autem prædicata attinet, quæ Sanguini competunt, tunc quædam illorum nostris respectibus atque usibus non respondent, alia vicissim seorsim nostro instituto quadrant; in respectu privativo non agemus de motu sanguinis progressivo, nec de insolito colore & odore, nec de origine ejus & sanguificatione, neque de specialibus viribus illius, neque de generatione, fermentatione & corruptione, nec de usu medico & œconomico, nec de sympathia, nec de prognosi ex illo formanda &c. quoniam quodlibet horum argumentorum peculiarem tractationem & explicationem admittit atque requirit:—In respectu positivo suscepimus disquisitionem Sanguinis primo physicam, deinde etiam medicam, utraque invicem mutuam illustrationem sibi subministrare debet: prior physica contem-  
platio*





platio complectitur illius *analysin* quoad sua *elementa*, aut *principia materialia* constitutiva, deinde ejusdem *differentiam* sec. hæc principia, quoad diversitatem *ætatis*, *sexus*, *virium*, *temperamenti*, *vitæ generis*, *diætæ* &c. nec non rationem qualitatis *consistentiæ*, *generico* & *individuali* intuitu, ut & conditionem & considerationem *accidentalis* permutationis aliarum substantiarum materialium, quæ ad sanguinis *temperiem*, aut *intemperiem* acquirendam conferunt; quo pertinet indagatio, quænam substantiæ sanguini realiter & essentialiter inexistant & cohæreant, quæ vicissim *imaginariæ* & *suppositæ*, aut accidentales sint, e quibus posterioribus dein facile *falsæ*, *fictæ* & *erroneæ* ducuntur propositiones, demonstrationes & conclusiones, ut itaque præcedentibus suppositionibus cæca quadam credulitate non facilis assensus sit præbendus: Quoad *Medicam* autem disquisitionem annotari meretur, quomodo sanguis & *qualitate* & *quantitate* comparatus esse debeat, si mediante illo *vita* & *sanitas* acquiri debet; qualis sit *relatio* sanguinis ad diversum *motus gradum* variamque illius *speciem*; quibus *generalibus* usibus in œconomia *vitæ* sanguis destinatus sit, qualis sit generica *relatio* illius aut ad *vitam*, aut ad *mortem*; quid *commercii* intercedat sanguini cum corpore & anima; quænam requisita *materialia*, *instrumentalia* & *formalia* ad sanguinis conservationem & corporis integritatem inde indicari queant: an *in* sanguine *vita*, an *cum* sanguine *vita* obtineatur, quænam *inter sanguinem* & *vitam* cedat discrepantia, quid *varia organa* ad discrepantem sanguinis qualitatem conferant &c. singulæ hæc considerationes amplificum nobis aperirent campum, quo *physico-medicam* sanguinis contemplationem ingredi



& instituere queamus, quarum autem nonnullas hoc loco attingere lubet.

§. III.

Quod itaque Sanguinis *Physicam* i. e. quoad *principia* sua materialia & *affectiones* simpliciter *materiales* instituendam contemplationem attinet, tunc *generalem* illius *definitionem* præmittimus, & dicimus quod sit *miscela sulphureo-terrea, rubicunda, mediante diluta gelatinosa substantia in humidam consistentiam conversa, ad varios vitæ & sanitatis formandæ, informandæ & defendendæ usus, necessaria*: quo loco brevibus *communem* illam, & medicis valde *familiarem* præmittimus Sanguinis differentiam, qua inter *Massam Sanguineam*, & Sanguinem *proprie*, essentialiter & formaliter in illa massa comprehensum distinguere solent: *illa* enim massa complectitur *colluviem, congeriem & confluxum diversorum* humorum fluidorum aliarumque *materiarum* variis *usibus* ac destinationibus asservatorum, dum vel *nutriendis* partibus *solidis* & organis, vel *reparando* sanguini deficienti, vel *humectandis*, leniendis & mobilizandis variis partibus, vel adimplendis & rite extendendis partibus vasculosis & porosiss, vel *depurandis* & abstergendis solidis, vel resolvendis *variis fluidis* partibus, vel adjuvandis diversis præparationibus, depurationibus, separationibus, se-& excretionibus, &c. inserviunt, & Serum, lympham, chylum, lac, bilem, salivam, &c. &c. constituunt: Sanguis vicissim *genuino* & proprio suo significato in massa eadem comprehensus, est materia, quæ ab *omnibus reliquis* humoribus *discreta* est, & *rubicundam* illam substantiam efficit, quæ non modo *per se* rubicunda est, sed universam massam in *naturali* suo statu eodem rubore imbutam



tam oculis nostris offert: De *posteriori* itaque hac substantia, in reliqua massa fluctuante, præc. nobis differendum erit, quamvis non in nuda abstractione, verum etiam in sensu *concretivo* dein Sanguinis disquisitio paululum instituenda erit: non quidem hoc loco illorum sententiam amplectimur, qui distinguunt Sanguinem in ejus *serum* & *cruorem* sive coagulum, licet negare non possimus, quod in *cruore* adhuc *multum feri* cohæreat, & in *sero* & *aqua* & *oleum* & *salia* & *aliæ* particulæ inexistant: Reminiscimur autem veri alicujus testimonii authoris *rr. de digestionē & morbis ventriculi. §. 1. c. 7. & 8. (vid. A. E. L. An. 1714. Apr. p. 175.)* *chymici* certe sanguinem dissociando, texturam ejus rumpendo, particulas dilacerando, situm mutando, ordinem variando & figuram alterando, non tam bonas ejus docuerunt qualitates, quam vitia. Pro naturali enim & vera cruoris substantia nobis obtruserunt, quicquid mediante *analisi* & ignis tortura ex eo extorserunt. Inde enim orta sunt *salia volatilia, fixa, alcalia, acida, sulphurea, spirituosa*: inde enim natae sunt *ideæ de fermento, fermentatione, effervescentia* &c. quorum tamen neutrum in corpore nostro existit: vera autem sanguinis constitutio omne excludit fermentum: est enim sanguis instrumentum vitæ & fulcrum sanitatis &c. talia artificialia & quoadentenus coacta experimenta circa sanguinis humani sal volatile, oleum genuinum, sal ejus fixum ad salis marini naturam accedens protulit BOYLE in *apparatu ad histor. natur. Sanguinis*; qui illico sanguinem in duas dividit partes, *serosam* videlicet & *grumosam*, quam divisionem BOHNIUS etiam amplexus est *Circul. anatom. progymn. 17.* Veritati itaque apprime respondet assertio, quod ZWELFERUS, BOHNIUS, STAHLIUS alique testati fuerant, videli-



cet operosa & scrupulosa chymica corporum indagatione ut plurimum magis confusa, *nova* & ad veram atque *genuinam* illorum subjectorum *essentiam* ac *formam* detegendam, *minus* absolute spectantia obtineri producta: in applicatione ad *sanguinem* hanc observationem ducentes, curatiori pensitationi subicimus scrutinium, quid sentiendum sit de Sanguinis *spirituascentia*, de *oleo* illius æthereo, de *Sale* & *spiritu* ejusdem volatili, de *variis salibus*, quæ diversis speculationibus, opinionibus & theorematibus medicis ansam præbere solent; an forsan hæc examina chymica & *artificiosa* indiscretim *naturali* scrutinio sanguinis bona, si non cæca fide applicanda sint.

§. IV.

Ast dum *Sanguinis forma* & *Essentia*, non alio, quam *physico* & *chymico* examine recludi & cognita reddi potest, ideo in hoc scrutinio *simplex* & *naturæ* magis conveniens modus atque processus institui debet, ne *scrupulosa ars naturalem* qualitatem sanguinis confundat: agamus quoad hoc requisitum, quantum possumus, evitando *inutilem* curiositatem, quæ *ingenuam* simplicitatem proster nit atque expellit: Sanguis itaque in *speciali* & ab aliis humoribus *distincta* essentia, est corpusculum *mixtum sic cum minori sulphurea, copiosiori terrea eaque alcalina magis parte* constans; in hac *specialissima* sanguinis definitione loquimur de sanguine in *naturali* sua qualitate considerando, bene quidem gnari, quod sanguis tam in *tota sua massa*, quam in *speciali* sua substantia per ætatem, sexum, temperamenta, vitæ genus, diætam &c. variet: nostræ assertionis rationem reddentes, *simplicem* hanc sanguinis analy sin proponimus: Si copia Sanguinis, aut ex arte-  
ria



ria, aut ex vena, aut aliunde efflua colligitur, aliquandiu in patella asservatur, tunc illa tandem *in cruorem*, aut *coagulum* transit, inde quantitas quædam *fluidæ*, *mucoginosæ*, *pinguis*, *olidæ*, *aquosæ*, *salsæ*, plus minus in flavedinem inclinantis substantiæ secedit, quoad vulgo *serum sanguinis* vocatur; quo separato, si residuum cruentum coagulum in chartam bibulam & volumen ejusdem deponitur, multa copia illius liquaminis huic se imbibit atque imprægnat, ut *primum* sanguinis pondus ad *dimidium* decreverit & in fasciculum illum chartaceum *multum pinguis* & *aquosus*, paucissimum vero rubelli liquoris se instillaverit: *residuus* cruor in vaporoso & Mariæ balneo *leni igne* tractatus, denuo liquamen modice *salsum*, paulo magis flavescens & olidum dimittit, relicta imminuta rubra portione, quæ si *absque coactione*, aut tortura chymica denuo vitreæ cucurbitæ committitur, & e capella arenaria temperato igne urgetur, iterata vice *humidi* & *flavescentis* quid *oleosi empyreumatici* alembico, rostro & recipienti adhærescens, imo in præpositam recipientis aquam tantillum insinuat, *remanente* in cucurbita terrea, *fixa*, *sicca*, pulverulenta *rubra*, *bolum rubrum* referente, materia, quæ si adhuc *calida* est, *fragrantem sulphureum* spirat odorem: hæc massa si in ignem conjicitur facile *flagrantem* pallide cæruleam concipit *flammulam*: quod si illa massa, (pauca quantitate comprehensa, ut vix ex uno pondere sanguinis *recenter* effusi, *duæ* illius obtineantur *unciæ*) leni sublimatione tractetur, tunc sublimantur pallide flavescences flores, ut *sulphur* odore, colore & *flagratione* conspicui pondus drachmæ unius & adhuc infra æquantes, reliquum mortuum caput exhibet pulverem pallidum, cum acidis

C  
liquo.



liquoribus effervescentem, ideoque *terreo alcalinam* suam essentiam producentem: hinc commodè concludere possumus, hunc *rubicundum pulverem*, sanguinem *simplicem* & præcipuo respectu esse corpus mixtum e *plurima terrestris alcalinæ* calcareæ, & aliquali *sulphuræ* substantiæ parte constans: *imitatio* simplex & absque magno artificio chymico institui potest, si *Salis tartari* puri partes *tres* & florum *sulphuris* pars *una* in crucibulo leni funduntur igne, emergit inde massa *rubicunda*, quæ vulgo *hepar sulphuris* nominata & aqua calida in qua tantillum purioris *ichthyocollæ*, aut tragacanthi albi solutum est, dissoluta, valde *sanguinem* animale *colore* æque ac *consistentia* æmulatur; quo reciproco experimento absque coactione chymica, aut sic dicta *tortura artificiali*, demonstrari potest, talem sanguinem esse substantiam *essentialem*, qua denotatione *positive* indicamus, *quid sit*, non vero qualem *figuram* habeat, aut *unde* formetur, aut *quomodo* producat, aut qualis in *tota* sua *massa* sit *Sanguis*: nam *aliter* definienda & resolvenda est tota illius *Massa*, aliter vicissim illa substantia, quæ in massa plena *proprie* & *genuine* Sanguis vocari meretur: Talis itaque est sanguis quoad *substantiam* suam in *omni* subjecto, ætate, sexu, temperamento &c. dum reliquæ *variæ* qualitates, quoad *has causas* & hocce respectus *discrepant*.

§. V.

Alia autem sanguinis analysis est, respectu *totius* massæ, in qua *diversæ salium, sulphuratorum* subjectorum, *terrarumque* species comprehenduntur, ita ut magna *differentia* sanguinis, quoad *causas* ita dictas *naturales* occurrat; in qua observatione etiam *præternaturales* causæ & esse-



effectus nec oblivioni tradendi, nec cum *naturalibus* confundendi sunt: si quis enim ad Sanguinis *formam* & *essentiam* referre non erubesceret, quæ in *hypochondriacorum, scorbuticorum, cachecticorum, ictericorum, scabiosorum, leproso-  
rum, venereorum, asciticorum* sanguine &c. reperiuntur adventitia, insolita & *morbifica* principia, omnes sane homines tali seminio infecti perperam dicendi essent: quod vero prædicta & a nobis allegata *analysis omni sanguini* competat, facile inquiri & dijudicari potest: quoniam autem in sanguine *Sulphureum* principium *præcipuum* est, ideo veritati *minime* conformis est affectata illa assertio & larvata demonstratio authoris tractatus *de la digestion & des maladies de l'estomac* quando *Part. II. cap. 2.* sanguinis motum fermentativum hisce abnegare contendit rationibus, quod *principia fermentationis in sanguine nondum sint demonstrata: NULLUM ENIM SULPHUREUM* adesse; tale enim sanguinem a fermentatione potius, præservare; quod porro nullus effectus allegari possit, qui a Sulphure dependeat, nec acidum morbosum supponere deceat, quia sanguis per impetum circulationis potius *acris & lixiviosus* evaderet: idem author mox in initio hujus capituli secundi asserit: cum igitur causæ, quæ vitam nostram conservant, nullæ debeantur fermentationi, & motus intestinus sanguinis, qui fermentationis basis vulgo creditur, non detur, frustra etiam morborum causa fermentationi tribuetur: confusam itaque atque contradictoriam hanc decernimus assertionem, in qua medius terminus esse debet, quod *in sanguine nullum principium sulphureum* deprehendatur: Diffusior vicissim, si non perinde magis confusa est sanguinis *analysis*, quam *Raymandus VIEUS-*



SENS *tr. de remotis & proximis mixtionis principiis &c. tr. I. cap. 8.* profert, Essentia sanguinis ab illo determinatur, quod sit corpus liquidum, pingue, rubrum, in corde formatum, reliquis corporis partibus colorem, humiditatem, nutrimentum & motum præbens, vitamque adeo conservans, cujus moleculæ sive corpuscula e terra, phlegmate, sale & sulphure videantur conflatae, ac respectu ad magnitudinem habito, tenues, mediocres & crassæ tribus elementis quodammodo respondentes intelligantur: In specie sal triplex sanguini inesse, tribus indicatur experimentis: sal nempe fixum e latice aquoso ascitici cujusdam extractum, magnam in lingua acrimoniam excitando, quam levis tantum evanidaque aciditas comitetur, valdeque cum acido quodam spiritu fermentescendo, de salis acris, sive alcalini in sanguine præsentia naturali testari: sal autem pingue ex hominis sani sanguine exustionis, lixivii & evaporationis ministerio elicitum, aciditatem minime molestam præbere gustandam: urinae denique salsedinem & terrestre sal neutrum ex ipsa extractum, dum ignis vi in vapores solvitur, neutrum sanguinis sal demonstrare: Magis itaque experimentis & rationibus physicis atque chymicis consonum est, quod Sanguis, eo quia rubicundus est, omnino de sulphureo principio participet, id quod testatur BOHNIUS *Circ. anat. progymn. 13. p. 199.* qui pariter *p. 190.* rubellam sanguinis partem in reliqua massa præ reliqua, quam serosam nominat, quantitate minorem declarat, & recte judicat, inquiens: mirum videtur, physicos ac medicos hætenus omnes de sanguinis officina, organo ac productione adeo sollicitos fuisse ac cruentas fere inter se turbas & lites de his concitasse, cum tantillum sit, quod sanguinis, proprie ita ipsis dicti purpuram gerat:

Dubia



Dubia itaque admodumque vexata illa nobis videtur Massæ sanguineæ resolutio, quando cum CRAANEN *tract. de homine cap. 17. p. 162.* tam varia eidem tribuuntur principia, videlicet *aquea*, quæ sanguini fluiditatem, *terrea* quæ consistentiam, *salina* & quidem in genere, seorsim autem *acida* & tandem *oleosa*: de quibus singulis quidem generatim asseverare possumus, quod massæ sanguineæ inexistant, & quidem *volatilis* & *fixæ* consistentiæ, nec tantum *acida* & *alcalia*, sed & *mediæ* essentiæ, ut cum eodem auctore exclamare possimus, *hæc salina principia particulas habent rigidas, acuminatas, teretes, tricuspidēs & similes, ita ut reapse liceat exclamare, quis est, qui salium species enumeret? nemo horum, i. e. hominum: sed sine dubio multæ adsunt nitrosæ, partim ex aëre per pulmones in sanguinem intrusæ, partim ex alimentis: in qua exclamatione quædam vera, aliqua etiam erronea & ficta sunt.* Similiter VATERUS *in physiolog. experiment. Sect. 7. c. 24. tb. 4.* heterogeneas partes salinas huic massæ tribuit, quas a *saporabilitate* illius & resolutione *chymica*, dum copiosum Sal volatile urinosum præbet, ut & a *putrefactione* ejusdem, quæ præter fœtorem simile Sal volatile probat, *relieto sale fixo & salso*: quæ tamen analysi denuo nobis anceps & *coacta* videtur: tandem reminiscimur *examinis* sanguinis bovini & humani *Chymici*, quod satis amplifice VERHEYEN *in Supplemento anatomico tr. I. cap. 9. p. 32. sq.* exponit: sed & in eodem facile apparet, quod aut *prævia putrefactione*, aut *tortura nimii ignis* sanguini ingens vis illata fuerit, ut facile *alia*, quam quæ *naturali* statui ipsius competunt, inde producantur, *subjecta*, & ab *artificiali*




tali coacta sanguinis indagatione ad *naturalem & ordinarium* ejusdem statum non valeat consequentia.

§. VI.

Præcipua qualitas, qua Sanguis inclarescit, & ab aliis *specialissimis* humoribus corporis humani se distinguit, est *Rubor*, cujus *diversæ* causæ vulgo proferuntur; in *naturali* quidem suo statu ejus rubedo *eminentior*, attamen, ut supra diximus, per ætates, temperamenta, diætam & vitæ genus discrepans est; quando vero *motu* suo vitali destituitur, communiter in *nigrum* vergit colorem: quare *generice* indicamus ruborem non accidentalem, sed *essentialem* sanguinis qualitatem esse, licet coloris exaltatio & *mutatio* variis aliis *accidentalibus* causis & respectibus tribui debeat: Haud quidem LOWERI sententiam amplectimur, qui *tr. de corde cap. 3. p. 180. seq.* hunc ruborem *permixtioni aëris cum sanguine in pulmonibus* contingenti adscribit; cui sententiæ multum inhæret BOHNIUS *circ. anat. progymnas. 13.* & SWALBÈ in *disquisitione therapeutica*: siquidem nec in illud assertum consentimus, quod *ordinarie* aër, communi sensu appellatus, *membranosam pulmonum* texturam & substantiam *penetret*; deinde concedimus, quod *subtilior* aëris *æthereæ* pars illico quidem penetrare & sanguini permisceri queat soleatque, quod etiam ruboris exaltatio huic miscelæ æque adscribi queat, ac si sanguis *sufficienti limpida* aqua permixtus magis rutilat, quam alter sanguis, cui deficit sufficiens hæc *diluens* materia; aut quemadmodum in pulmonibus sanguis cum *depurata* lymphâ, a thoracico canali & sinistra subclavia vena afflua *intimius* permixtus, *floridior* & fluidior redditur, propterea tamen nec *aquæ*, nec *lymphæ* primario causa





causa formalis rubedinis adscribi meretur, ut ut utraque rubedinem extollat, resolvat, magisque conspicuam reddat, minime tamen efficiat; quemadmodum *nec æther principalis* causa ejusdem ruboris est, licet hic *sub motu* sanguinis, hunc humorem magis extenuet, *rarefaciat*, ideoque *flovidiorem* reddat: sicut enim color aut *realis* & in substantia materiali, forma & *mixtione* corporum, aut *emphaticus* & apparens est, qui posterior *distinctæ modificationi*, irradiationi, incidentiæ, refractioni & reflexioni radiorum luminosorum assignandus, ita quidem ad colorum conspectum, agnitionem & distinctionem radii *luminosus* requiruntur, dann zu Nachts sind alle Rûhe schwarz; tamen hæ causæ adspirantis *aëris* & concurrentis *illuminationis* vel *accidentalibus*, vel *sine qua non* causis annumerandæ sunt: alioquin gravis *causarum* committeretur *confusio*, simili experimento ac *Joh. Theod. SCHENCKIUS in historia human. generat. cap. V. p. 75.* cum sanguine humano *iridem* præsentare docuit, quales colores vero frustra in *substantia* sanguinis inquiruntur: nec *MOJOWIT* opinioni assensum præbemus, qui in *tr. de Sale Nitro c. 8.* rubicundum Sanguinis colorem *commixtioni particularum nitrosarum* cum *Salino-Sulphureis* tribuit: quoniam *ortus* & *accessus nitri* ad sanguinem hujusque *sulphureas* particulas, nec non *effectus* atque productio *ruboris* in *arte chymica* peritis conceptu æque ac obtentu sub congrua circumstantiarum conciliatione, difficilis, si non impossibilis existit: nec cum *WEDELIO in physiol. reformata p. 273. n. 3.* calorem luminosum & fermentum, quæ nobis obscuræ & tenebricosæ ideæ esse videntur: nec cum *CHARLETONIO æconom. animal. exercit. V. ff. 9. sq. caloren*



*rem motumque spiritus vitalis principem hujus qualitatis causam esse agnoscimus: nec etiam cum VATERO in Physiol. experiment. Sect. 7. cap. 24. th. 3. p. 659. novam digestionem, attenuationem & resolutionem chyli causam hujus ruboris esse admittimus, si materiam concernimus, quamvis hæc assertio sub sobria interpretatione aliquatenus salvari possit, quando videlicet experimenta illico prolata rite applicamus: quid quod denique aliqualis syncrismus cum chymicorum aliorum judicio de rubore sanguinis institui posset, quando illi causam ejusdem ruboris salis & sulphuris cum oleo sanguinis intimiorem mixtionem esse, perhibent; ubi denuo congrua interpretatione salvari potest assertio CRAANEN l.c. p. 216. dicentis: chylum non statim mutari in rubicundum sanguinem, sed post sæpius repetitas circulationes, quibus fit firmior & intimior unio salis & sulphuris cum sanguinis oleo.*

§. VII.

Nonnullas hætenus medicorum sententias de *rubedine* sanguinis recensuimus, nos itaque de *sanguine* quoad *propriam* suam substantiam differentes, nec alios interfluentes humores attendentes, sepositis *aquosis, oleosis, mucaginosi* & peregrinis *salsis* particulis, dicimus cum WEDELIO quod *Sulphur* sit *principale colorum* constitutum, aut juxta *observ. 167. A. N. C. dec. I. an. 10.* quod sit *matrix lucis*; quare præcipuam causam hujus ruboris *sulphureo* tribuimus principio, quod ex *chylo & lymphâ*, tanquam *pinguibus* humoribus, sub continuo massæ sanguineæ *progressu* atque circuitu per & intra partes *solidas, membranoso-vasculoso-fibrosas*, resolutum, cum aliis præc. *terreis alcalinis* principiis successive *coalescit*, sicut alias



alias *sulphur* cum *alcalinis* substantiis *facillimum* init com-  
mercium, & sub tali societate *ita efficax* evadit, ut com-  
pactissimum *auri* metallum tam *subtiliter* resolvere & nu-  
da aquosa coctione separare queat, quo dein ipsum *phil-*  
*trum* eadem soluta auri ramenta penetrent: ideo juxta  
principia *physica* & *chymica practica* ratum & statum est,  
quod homines tali *dieta* fruantes ac tali *temperamento*  
præditi, quibus *multa pinguis* chylosa & *lymphatica*, nec  
non largior seri *biliosi* copia generatur, multo eoque *flo-*  
*rido* atque rutilante sanguine instruantur, velut *Sanguineæ*  
& *Cholerici* homines esse solent, in quibus sec. analysin  
chymicam relative *major* copia rutilantis, aut *rubicundæ*  
substantiæ, quam in *aliis* reperitur subjectis: Et quoni-  
am sanguis *plurimam* sui ruboris partem retinet, etiamsi  
a reliquis commixtis aqueis, pinguibus, gelatinosis, falsis  
&c. partibus *liberatus* & separatus fuerit, in illa vero re-  
sidua genuina sanguinis substantia vel *obscurior*, vel magis  
*conspicua* rubedo, pro diversitate *subjecti*, (unde ille san-  
guis collectus est,) vel *fortioris* magisque strenuæ tracta-  
tionis *chymicæ*, remanens non aliunde quam *materialiter*  
ab eodem principio *sulphureo* & *formaliter* ab illa *miscela*  
*hujus* principii cum terreo-*alcalina* substantia provenit,  
ea propter remotiores & *adventitias* causas, *essentiatibus*,  
proximis & principalibus haud *præferre* debemus: quod  
vero in *coagulo* sanguinis *inferior* pars *obscurior* sit, & ad  
nigredinem magis accedat, *superior* vero magis *rutilans*  
appareat, nondum solide probat, *aërem* ruborem effice-  
re, licet velut *externum* adminiculum ad eundem san-  
guinem *illustrandum physica* quadam relatione contribuat,  
dum ad *crassiorum*, mucaginosarum, gelatinosarum & ter-



restrium particularum *coagulationem* accelerandam & adjuvandam concurrit, quæ *ponderosiores* & *crassiores* moleculæ *fundum citius* petunt, *subtiliores* sanguineæ autem *rutilantes superius* magis sub sero fluidiori, quod secessit, fluctuant, illicoque facilius conspicuæ evadunt: recte itaque WILLISIUS *in diatribe de febr. num. ii.* ut & David von der Bese *in experiment. & meditat. circ. rerum natural. princip. Lib. i. pag. 62.* ruborem sanguinis a principio *Sulphureo* præcipuo respectu derivant: Quando vero sanguis a *figura globulosa* definitur, tunc hanc explicationem nec *materiæ*, nec *formæ* congruam esse, judicamus, dum *genuina* sanguinis substantia *non sphaerica*, reliquæ etiam particulae in massa sanguinea *non æqualiter globulosæ*, sed pro varietate *subjectorum*, de quibus sanguis exceptus est, & *observatorum*, tales inspectiones & explorationes instituentium, imo aliquando ardentioris virtutis *imaginativæ* discrepant: Ita enim LEEUWENHOECK *in anatom. p. 54.* sanguinem ranæ *ovali* figura præditum delineat, *p. 56.* testatur *aquam inter cutem & carnem fere quoad inordinatas particulas rotundam fuisse*: occasione hujus considerationis, nec LEEUWENHOECKIO adhæremus, quando *in arcanis naturæ pag. 3.* ruborem sanguinis hisce globulis adscribit, & illico inquit, *non enim credo illos, qui de sanguinis confectione loquuntur, aliud intelligere, quam illam materiam, quæ sanguinem reddit rubrum, quales sunt hi globuli*: ast quoniam hæc philosophia lepide admodum cum ejusmodi globulis ludit, & modo coherentes & viscositate conjunctos, modo separatos & disjunctos tales globulos projicit, ideoque magis circa corticem, quam *nucleum* versatur, eapropter hanc observationem



tionem tantum *dubiam*, fallacem, *instabilem* magis sanguinis qualitatem, quàm *realem* ejus enuncleationem completi judicamus.

§. VIII.

Quod porro sphaericam & *vesiculosam* hanc sanguinearum molecularum *figuram* attinet, tunc varii varie perbelle circa illam observationes suas instituunt & delectationes suas profitentur: hæc indagatio itaque mediantibus *microscopiis* instituitur, quemadmodum in *transactionibus Anglicanis experimenta Furini & Archibaldi Adams circa inspectionem sanguinis per microscopia*, proferruntur; *conf. A. E. L. An. 1723. Martii p. 75. Philosophia vetus & nova ad usum scholæ accommodata Paris. edita 1681. in 12mo, in qua de sanguinis analysi mechanica ex observationibus microscopicis a LEEUWENHOECKIO factis agitur vid. A. E. L. An. 1683. Januar. p. 16. Sicut MAUBECIUS tr. de dysenteria cap. 6. sanguinem credit compositum esse ex globulis rotundis lymphæ innatantibus: & BOHNIVS æque loc. cit. p. 190. globulos s. grumulos rubicundos eundem appellat, & p. 200. ait: quod sanguis in microscopio appareat, ut vesiculæ rubicundæ per lympham crystallinam translatae: addimus pro curiositate augenda & satianda, quæ BIDLOO tabula 23. profert: propono in fig. XVI. Sanguinis guttulam vitreo tubo inclusam, cujus particulae adjuvante microscopio, adaucta forma demonstrantur, globosæ vesiculæ, fibrulae varie tortæ, stratae atque dispositæ, massula striata, vel ovi albuminis similis, quæ vitro hermetice ab altero latere clauso calefacto, motis, rotantibusque globulis, ubique inter eorum corpora observatur: aliud præterea profert experimentum & pergit: Separato a frigefacta*

D 2

concre-



concretaque sanguinea massa, aqueo ac albuminoso liquore, qui variæ est substantiæ ignique impositus brevi concre-  
scit, remanet pars rubicunda, cujus fluidior portio aquæ te-  
pidæ ablutione iterata grumosi instar acervi apparet, hujus  
singulæ particulæ globulum vesiculosum exprimunt quorum  
quidam diaphani alii opaci sunt: reliqua massulæ portiun-  
cula fibræ constat flexibilissimis, frigefactis vero & aëri ex-  
positis tenacissimis, tensilibus atque retiformibus: ob signat  
tandem hanc indagationem tertio experimento sequenti-  
bus: tertia insuper sanguinis perscrutandi methodus est,  
quando sanguis ab innatante liquore liberatus chartæque  
axungia lenitæ impositus parum exsiccatur: extrinsecam  
post particularum illustrationem digito levi, conterenda san-  
guineæ massulæ portiuncula, in qua statim *DIVERSÆ* ap-  
parebunt *CONSTITUTIONIS* atque *FIGURÆ* globuli, fi-  
brulæ atque ejusdem generis explanatæ striæ: Quadrat huc  
observatio *BARTHOLINI* in *Act. Hafn. Vol. 3. obs. 3. p. 7. sq.*  
titulo: *microscopiis detecti globuli in sanguine*: in qua ob-  
servatione asseritur, quod sanguis globulis conficiatur,  
quod juxta principia optica & Cartesiana *refractio* radio-  
rum lucis ad sanguinis colorem applicari queat, quod serum  
sanguinis globulosum existat, quod capilli, pinguedo, cuti-  
cula, ungues, ossa globulis repleta sint, & sicut mundus  
opinionibus, ita *microcosmus* globulis velut regatur: om-  
nibus hisce annotationibus annectimus *examen sanguinis*  
*per microscopium ramosi* deprehensi a *WEDELIO* in *A. N. C.*  
*dec. 2. an. 5. obs. 156.* & *VERHEYEN* loc. cit. p. 32. obvium:  
ex omnibus autem hisce merito concludimus *essentiam*  
sanguinis minime cum *figura* illius esse confundendam,  
quoniam juxta superius traditam ejusdem resolutionem  
illius





illius substantia non in nudis bullulis, vesiculis, aut globulis consistere potest, dum sanguis æque in *interioribus* suis receptaculis, quo *liber* & communis accessus aëris non patet, sed variæ *ambages* & circulationes illius præcedunt, irradiatio *luminaris* pertingit, *rubicundus* existit: attamen non negamus particulas sanguineas, vel a tota *massa* separatas, vel *superficiarie* exsiccatas aliqualem, licet non exacte, sed *varie* discrepantem sphaericam figuram possidere, quæ tamen non ad *genuini* sanguinis substantiam, sed ad pinguem, unctuosam, aut *gelatinosam massæ* sanguineæ internatantem fluidam partem pertinet, quæ *terrestribus* sanguineis moleculis ita adhærescit & se agglutinat, velut *semina* in *malo granato* multo numero contenta, pulpa illa *liquide mucaginosa* involuta sunt, quæ nudo & minus armato oculo velut globuli *ovales* (quales sunt globuli sanguinei Leeuwenhæeckiani) conspicui evadunt: & dum illæ sanguineæ moleculæ diurno & nocturno continuo suo volvuntur motu, ideo *sphaericam* hanc figuram obtinent, continent, & sibi invicem complicantur atque cohererent, ut juxta Leeuwenhæeckianam observationem sæpe numero plures illarum sibi invicem connexæ appareant. Ast cui usui hoc otiosum in medicina, præter curiositatem sit, negotium, non facile assequi licet, nisi confuso modo argumentari velimus, quod hæc figura globulosa motui sanguinis adjuvando aptissima sit: quæ opinio autem in *concreto* & statu hominis vivi conciliata variis paralogismis & contrarietatibus obnoxia est; quare huic speculationi inhærere haud placet.

§. IX.

In physica Sanguinis analysi, varii medici quæstio-





nem movent, an sanguis *fibris* gaudeat, quam quæstionem quidam *affirmativa*, alii *negativa* sententia decidunt: e priorum serie est GORRÆUS in *defin. med.* p. 11. inquiens: *sanguis fibrarum est plenus, a quarum frigiditate ipsum coagulari scribunt Hippocr. Lib. de carnib. & Aristoteles histor. anim.* huc pertinet SPIGELIUS in *fabric. humani corp.* Lib. 4. cap. 12. p. 182. qui sanguinem ex sero aqueo, rubro colore & *fibris sanguineis* constare asseruit: ita enim HARVEJUS de *generat. animal. exerc.* 52. p. 203. ad sanguinis substantiam refert partes *fibrosas & densiores*: similes fibras in sanguine etiam FERNELIUS Lib. 6. *Physiol.* c. 7. agnoscit: GARMANNUS de *mirac. mort.* Lib. 2. tit. 7. §. 20. p. 552. *extractione* ita fibrarum existentiam in sanguine defendit: *fibræ mihi idcirco sanguini concessæ videntur, ne in capillaribus vasis obstructions oboriantur: scilicet ne crassus sanguis in illa irruat, sed saltem subtilis*: at quis non facile concipiat, quam cito hæ fibræ, si *cribri* vices subire deberent, canales potius *obstruere* queant, debeantque: *conf. BIDLOO l.c.* Nos BOHNII amplectimur iudicium, quod rationi & observationi magis conforme est, qui *progymn.* 13. p. 187. ita differit: *hæc substantia gelatinosa rubicundarum particularum vinculum est, quod vulgus fibrarum nomine appellat, & per cujus majorem minoremque abundantiam rubedini complicatam, sanguinis consistentia variat, facileque aut difficilius coalescit: quamvis enim viscus hic, si sanguis aut ex venæ vulnere, aut alius aquæ calenti immittatur & cum hac refrigerescat, instar lanæ carptæ aut fibrarum membranacearum, reticulatim sibi implexarum, lateribus ac fundo vasis adhærescat: fictæ tamen hæ sanguinis fibræ sunt, quas in hoc nulla oculorum aut instrumentorum acies deprehendere poterat,*



*terrat, sed aqua calida sanguinis glutinosam portionem dissolvit, quæ cum illa postmodum refrigescens in tenuiora filamenta congelascit: mox subnectit laudatus author, quomodo arte tales fibræ parari queant: Etenim tota massa sanguinea in naturali suo statu multa gelatina permixta est, quæ in junioribus hominibus & animalibus largior, mollior, lenior, laxior & pinguior existit, ideo talium subjectorum sanguis & caro simili qualitate fruitur; hæc gelatinosa, viscosa & oleosa substantia reliquas ad massam sanguineam spectantes materias magis continet, ne citius separentur atque diffuant, ideo eadem gelatina mucaginosa circumducit atque involvit particulas sanguinis rubicundas terrestres, quibus comparate globulosam figuram conciliat, dein reliquam aqueam substantiam in intimiori miscela conservat, quo toti massæ necessaria fluiditas & mobilitas subministretur, ut minores vias, mestus & canales angustiores facilius penetrare queat: præterea eadem gelatinosa materia canalium superficies oblinat, ut per illos humores melius transire possint; fibras motrices lenit & emollit, ut flexiles & tensiles maneant; organa humectat & elubricat, ut transitui humorum magis obtemperent; partes teneras & sensiles linimenti instar muniat, ne a salibus acribus offendantur; ipsa hæc salia per massam sanguineam oberrantia, temperat, corrigit & involvit; Sanguinis integram congeriem a citiori resolutione præservat; partes membranosas & nerveas grata lubricitate delinit; impuritates, solidis partibus adhærentes, abstergit; massæ sanguineæ etiam talem congruam & volubilem consistentiam conciliat, qua sedatius, moderatius & ordinatius per suos canales atque cribra progredi queat,*

ne



ne illa aut *subtilior* atque *aquosior* sit, ubi leviori motu in *perniciosum orgasmum* dissipari solet, qui dein omnibus vitæ & sanitati ministrantibus qualitatibus & functionibus, valde *præjudiciosus* est, aut nimis terrestris, *crassa* & densa existit, quæ perinde momentaneis, multis & in toto corpore oborientibus damnis continuam, certam & efficacem præbet occasionem: hinc in compendio indicavimus, quales *physicæ* & *medicæ* contemplationes de hac *gelatina*, massæ sanguineæ intermixta, institui & indicari mereantur.

§. X.

Quod massæ sanguineæ præterea *multæ species Salinarum* particularum interfluant, satis manifestum est, quarum aliæ *fixiores*, aliæ *subtiliores* sunt, quædam *simplices*, nonnullæ *mixtæ*, aliæ cum *alterius* speciei salinis particulis, quædam cum *sulphurea* portione, nonnullæ cum subtiliori *oleosa*, aliæ cum *mucaginosa*, cum *terrestri* substantia, sub illa indefinente circumvolutione, circulatione & conquassatione combinantur; siquidem ad hanc mutabilem & discrepantem *genealogiam* salium in massa sanguinea, varietas & ratio *diætæ*, *aëris*, locorum, provinciarum, *aquarum*, *vitæ generis* &c. multum contribuit: e congerie autem talium Salium, quædam *absolute perniciosa*, alia vero in *tantum utilia* sunt, ut alias *viscidas*, *crassas* & *tenaces* materias colliquant, resolvant, incidant, *abstergant*, aut *organa* quædam modo lenius, modo intensius *alliciant*, quo officiis suis fungantur, testimonio *bilis*, velut *monitoris intestinorum*, & *seri salsi*, quod *urinaryas* vias stimulat: siquidem alia temperata salia *blande subtiliter* reliquas *fibras motrices* afficiunt, quo in officio suo



suo perennent, sicut *salia valde acria* ad *Spasmos, Rheumatismos & convulsiones* ex parte disponere solent: insinuantur vero hæc *salia* atque generantur & communicantur vel e *prævia* variorum humorum aut *resolutione*, modo laxiori, modo intimiori, aut *rarefactione*, vel ex *ingestis*, vel ex *atmosphærico* aëre; eapropter *discrepans* hæc *salium* miscela cum massa sanguinea quoad *quantitatem, qualitatem & modum* mixtionis ad *colorem & consistentiam* sanguinis diversam disponere solet, ut nunc sanguis *floridior*, alibi *obscurior*, modo in *flavedinem* inclinans, alias *pallidior*, mox *subtilior & tardius* coalescens, interdum *cito* congrumescens, aliquando *irregulari & inæquali* permixtione præditus deprehendatur: ideo etiam Sanguinis *mixtio, color & consistentia discrepat*, quando is *fortius* commovetur, *rigidioribus* fibris agitur, *citatus & intensius* per canales & organa, per carnes & tunicas transprimitur, indeque magis incalescit, quales qualitates in *cholericis* subjectis deprehenduntur, quorum sanguis flammeo magis ac *rutilante* colore præditus, subinde etiam *subtilis* ac magis spumescens, nec non *acrior & salino sulphureo* odore qualificatus existit; in quo plus feri biliosi, volatilis & penetrantis interfluctuat &c. dum contra *melancholicorum* sanguis *obscurior, crassior & ponderosior* est, cui *parum aqueæ* humiditatis innatat, paucum *subtilis sulphureæ*, sed plus terrestris & mucidæ viscidæ ac salinæ fixioris acidæ substantiæ inexistit, qui *tardius & impeditius* mediantibus *strictis & aridis* fibris intra *ampliores* canales circulatur, cui *crudior chylus & parciior fluida & diluens* materia affunditur & intermiscetur: *Sanguineorum* sanguis *saturatus*, consistens, gelatinosus ein fettes Blut, etiam causas suas phy-



ficas & medicas habet, curab *aliorum* subjectorum sanguine *discrepat*, in qua diffusiori commemoratione diutius moramnectere instituti nostri ratio haud permittit: Perinde Sanguinis massa pro differentia *ætatis* variat, in quantum *juniora* subjecta *molliori* & magis *liquida* fruuntur diæta, provectiora vicissim, *consistentiori*, ac duriori magis delectantur victu: ut huc quadret antiquorum medicorum canon, *qualis cibus, talis chylus, sanguis, sanitas* &c. propterea in hac ætate sanguis est *dilutior*, *rubicundior*, *pinguior*, *laxior*, lenior, mollior, fluidior &c. Variat porro sanguis qualitatibus suis *physicis* quoad *ingesta*, in quantum liberalius & sæpius salina *acida*, aut *spirituosa*, generosa, *sulphurea*, *aromatica*, aut sicca aut humida &c. ingeruntur: De *diverso odore* sanguinis cui volupe fuerit, quædam indagare, adeat GARMANNUM *l. c. Lib. 2. tit. 8. §. 34. sq.* discrepat & ille, pro diversitate modo dictarum causarum: variat insuper pro discrepantia *vitæ generis*, quoniam hominum *laboriosorum* sanguis ad *conspectum* meliores qualitates habet, quam *otiosorum*: ideo venatione fugatarum ferarum sanguis totus spumosus est: Discrepat præterea sanguis colore & consistentia, pro *organorum*, quætransit fabrica: ita generatim *venosus* sanguis *arterioso* obscurior est; *dextri* cordis thalami sanguis nec ita rutilans, nec ita fluidus ac *sinistri* existit: Sanguis in *pulmonum* Substantia *spumescit*: quare in hæmoptysi sanguis spumidus quando ejicitur, pulmonibus debet, si autem *splendidius* rubens, aut *minus* spumescens fuerit, e vasculo *asperæ arteriæ* truncum percurrente erupit: quare iterum iudicio BOHNII subscribimus *l. c. p. 199. testantis: ad vesiculosam figuram sulphureas particulas intra pulmones evehi,*



evehi, colligitur quod purpureus & spumescens magis inde profluat sanguis, nigricans, qui eosdem influxerat: quam nihilominus spumescentiam rubedinis splendentis authorem esse, vel agitatio sanguinis V. Sectione educti testari poterat: conf. HIPPOCR. Sect. V. aph. 13. Coac. præn. n. 62. GALENUS de loc. aff. Lib. 4. Prosp. MARTIANUS ad ophor. pag. 457. JACOTIUS in Coac. p. 795. DIETERICUS Patr. Hippocr. n. 142. p. 276. Porro in Liene & utero sanguis spissior & obscurus facilius humore notatus apparet; hinc juxta communem accusationem sanguis nigricans & spissus vocatur ein schwermüthig, und Milsichtig Blut: idcirco WEDELIUS in physiolog. reform. p. 304. ait: *Lien consistentiam sanguinis dispensat*: quamvis hæc assertio bono indigeat interprete. Quod denique Sanguinis massæ nec aër, nec æther defit, nulli dubitamus; hic sicut omnia corpora physico modo penetrat, ita laxior corporis compages illius aditum ad sanguinem haud præcludit: ille vero cum visu & potu abunde corpus nostrum ingredi potest & solet, (conf. ELIAS CAMERARIUS dissertationibus de Spiritibus, qui aëri insignem viam in sanguinem cum alimentis admittit) ut non necesse sit ex inspiratione illius accessum ordinarium intra sanguinem haurire, quæ adsertio multis rationibus & experimentis infringi potest, insuperque peculiari disquisitione indiget; vid. BOHNIUS loc. cit. p. 68. seq. progymn. 4. AMMANNUS in Parænesi p. 305. Job. Maurit. HOFFMANNUS in idea machinæ humanæ Sect. 16. §. 3. p. 147. GARMANN. de M. M. Lib. 2. tit. 3. §. 55. Sed placuit tantum aphoristice has observationes allegare, quoniam singulæ ampliorem & peculiarem magis postulant tractationem:




tionem: *conf. DIETERICUS in Fabr. Hippocr. p. 110. sq. n. 15. de Sanguinis analysi.*

§. XI.

Id in ordine præsentis disquisitionis paululum adhuc inquirere placet, quid judicandum sit de *anima in sanguine*; Qui ad Sacrum Codicem provocant e locis *Genes. IX. 4. ne carnem cum suæ animæ sanguine comedatis, Levit. XVII. 15. animantium omnium animā sanguis est, qui pro ipsius anima est, & Deut. XII. 23. tantum a sanguine vescendo, vos abstinete, ne cum sanguis sit anima, animam cum carne comedatis*, illi animam inde *materialem, corpoream, sensitivam*, a rationali distinctam, cum corpore commercium tamen tenente demonstrare & evincere contendunt: paucis scrutari lubet, quid inde concludere liceat, tam secundum *interpretum* sententiam, quam juxta *rationis dictamen*: κατὰ τὸ ἐντὸν sensus esset, quod *in sanguine* velut *vehiculo*, involucro, aut massa lateat causa quædam, quoad specialem quidem *essentiam ignota*, quoad litteram vero *anima dicta*, aut quæ causa ipsa anima esse deberet, sed cum tam *fonticæ* operationes & virtutes de eodem sanguine prædicarentur, vix *communia principia materialia*, sanguinem constituentia, hanc animam esse posse, sed *subtiliorem, generosiore, spirituosiore* & quidem *arterioso* sanguini inexistentem substantiam esse debere; & hæc ita præsumuntur, supponuntur & creduntur, *nulla autem ratione demonstrantur* & confirmantur, ita ut adhuc secundum hæc ambages anima *sensitiva vivificans* in sanguine *essentialiter* latitans merito *non entibus* adscribi mereatur: Quod enim notationem *animæ* in S. S. attinet, tunc illius acceptio *multiplex* est; varios tales significatus proferunt





ferunt *Job. Henr. MAJI Supplem. in Lexic. Hebraic. Coccej*  
*p. 518-522. CASTELLUS Lexic. p. 2371. GLASSIUS Philol. Sacr.*  
*p. 1509. generatim significat animam, dein animam in se vi-*  
*ventem, hominem, vitam Genes. IX. 4. 5. cap. 37. v. 21. Levit.*  
*XVII. v. 11. animam rationalem, Genes. II. 7. hominem s. sin-*  
*gulos homines & singula animalia, corpus cum sensu, cor-*  
*pus animalis, sed in determinationis a vita sensu, affectum*  
*naturalem, balitum Genes. I. 3. Job. XLI. v. 12. mentem, vo-*  
*luntatem, desiderium &c. quis horum significatum præ-*  
*dictis textibus accommodandus sit, perspicendum erit:*  
 LUTHERUS in der Furken Auslegung über die ersten 25 Ps.  
 Psalm 21. v. 30. scribit: Das Wort Nephesch heißet ein  
 lebendiger Leib, oder Leib und Seel bey einander, wie es bey  
 einen lebendigen Thiere ist; & Genes. XLVI. v. 27. Das  
 Hebräische Wort Nephesch heißt allenthalben in heiliger  
 Schrift eine Seele, und der ganze Mensch wird also genannt,  
 denn wir sagen, der Mensch habe Leib und Seele und nen-  
 net ihn entweder einen lebendigen Leib, da eine Seele dar-  
 innen ist, oder animal ein vernünftigt Thier. Et ita etiam  
 Sanguis in S. S. diversimode accipitur, aut enim pro occiso  
 homine *Job. XX. 5. pro cædis causa Levit. XX. v. 9. Jos. II. 19.*  
*Judic. IX. v. 24. 2 Sam. I. v. 16. quo pertinet acclamatio Ju-*  
*dæorum Matth. XXVII. v. 25. & Actor. XVIII. v. 6. intelli-*  
*gitur porro pro cæde 1 Reg. II. 5. 2 Reg. IX. v. 7. Ps. CVI.*  
*v. 3. pro suppliciis capitalibus Ps. LI. v. 16. pro impura &*  
*peccaminosa hominis origine Job. I. v. 13. pro connata pecca-*  
*minosa infectione Jerem. XVI. v. 6. pro corporis infirmitate*  
*1 Cor. XV. v. 50. pro homine ex anima & corpore constante,*  
*quatenus peccato inquinatus est. Matth. XVI. v. 17. Galar.*  
*I. v. 16. pro bruti anima Levit. XVII. v. 11. 14. pro clamore de*



*vindicta coram Deo Genes. IV. 10. 4 Esdr XV. v 8. Ebr. XII. v. 4. Apoc. VI. v. 10. pro libidine Ps LI. quis iterum de hisce sanguinis significatibus, prædictis textibus conveniat, decidendum erit; ut nihil dicamus de diversa illius acceptione inter profanos scriptores: ubi pro genitura & semine habetur a SORANO EPHESIO in Isagoge cap. 16. GALENO Lib. 2. conf. OCTAVIUS HORATIANUS Lib. 4 rer medic. sic nati ex nobis sanguis vocantur VIRGIL Lib. 6. Æneid. projice tela manu, sanguis meus: quare fratres germani consanguinei nominantur TIRAQUELLUS retract. tit. 1. §. 1. gl. 9. Similiter SOPHOCLES fratres ὁμαίμοις ejusdem sanguinis appellat: de Polite animam efflante dicit VIRGILIUS Lib. 2. Æneid. concidit ac multo vitam cum sanguine fudit: non minus pro genere & natalibus dicitur ap. VIRGILIUM Lib. I. v. 19. pro generatione & claro sanguine genitis Seneca in Octavia v. 90. Ex hac diversa animæ & sanguinis acceptione cuilibet liberum sit judicare, an prædicti textus id absolute inferant, quod in sanguine sit animæ materialis, sensitiva, vivificans & quoad specificam essentiam & virtutem ignota & abscondita, & an non anima immaterialis cum sanguine commercium inire queat.*

§. XII.

Quod autem porro interpretes varios attinet, tunc e Medicis BARTHOLINUS tr. de Sanguine vetito p. 4. scribit: ipse *Ἑβρῶα* vocat animam sanguinem Genes. IX. 4. ubi anima & sanguis pari passu ambulant (ast ratione essentiae confundi haud debent) quem sensum expresserunt LXX. interpretes ἐν αἵματι Ψυχῆς: & Samaritanus cum anima ejus, quæ est sanguis ejus, sicut & arabs clarius: cum sanguine ipsius, quoniam ipse est anima ejus (ast hic iterum a brutis



brutis non valet consequentia ad hominem) *nec hinc abiit Flavius Josephus Lib. III. antiqu. jud. cap. 10. sanguinis certe esum ideo vetuit, quod hunc Φυχὴν καὶ πνεῦμα animam & spiritum putaret* (manet autem adhuc dubitatio, qualis animæ significatus huc quadret) *non proprie, sed synecdochice multi explicant, vel quatenus anima est in sanguine* (convenit hæc sententia cum illorum dogmate, qui animam etiam rationalem per universum corpus essentialiter extensam statuunt) *ita Syrus Genes. IX. carnem cujus sanguis est in anima ipsius: quomodo & Hebræus, Vulgatus, Onkelos, Samaritanus ad Levit. XVII. vel quia sanguis est animæ vehiculum. Arabs Levit. XVII. animæ carneorum omnium domicilium sanguis est: (propterea nec anima materialis esse, nec sanguinis aut hujus motus anima esse debet sensitiva corporea) eleganter ISIDORUS Lib. XI. orig. cap. 1. sanguis proprie animæ possessio est: & p. 5. revera tamen anima humana diviniore est naturæ: disputat de hac Lactantius lib. de opif. Dei cap. 7. recte negans si anima sanguine aut per vulnus effuso, aut februm colore consumpto, videtur exstingui, continuo in materia sanguinis animæ rationem esse ponendam: conf. quæ porro p. 6. differit, ubi in brutis animam & sanguinem synonymice interpretatur, eodem significatu uti sanguis & vita, quæ tamen separata sunt subjecta quoad suam formam & essentiam interdum pro uno accipiuntur: recte itaque Roder. a CASTRO Lib. 2. de meteor. microcosm. cap. 15. p. 84. dicit: sanguis est instrumentum animæ & sequitur animæ motum. Porro Hugo GROTIUS illud Levit. XVII. animæ omnis carnis est in sanguine ita exponit: vita carnalis est in sanguine & ita est metonymia: MARTINUS dicit vitæ sedes anima est:*



BOHNIUS *progymnasm.* 17. p. 185. *animam sanguinis motum vitalem vocat*: POLUS ita commentatur in *Levit.* 17. v. 16. *Vol.* 1. p. 529. lit. b. *pro anima ejus ipse sanguis est, vice animæ: sanguis conjunctus est ipsi animæ, & ita hanc vocem pro nominativo absoluto sic verto: nam ad vitam omnis carnis quod attinet, sanguis ejus pro vita ejus est; anima sanguis ejus est, scilicet consecutive, quia vita consequitur sanguinem: in Genes. IX. v. 4. ita scribit: accedit carnem dum est in anima sua i. e. in sanguine suo, dum adhuc prædita est anima & sanguine, h. e. dum adhuc vivit, ne vescamini carne cruda & cruenta, quia sic evaderitis crudeles: significat sæpe Ebræis anima illa vita, quæ sanguine & habitu continetur: anima, vita & sanguis idem significant: sic dicitur, quod sanguis sit animæ & alimentum proximum, quo conservatur & fovetur & instrumentum ad functiones vitales: anima hic pro vita sumitur *Job.* II. v. 6. *Job.* X. v. 15. 17. porro: nam anima omnis carnis sanguis ejus est, pro anima ejus est, nam ad vitam omnis carnis quod attinet, sanguis ejus, pro vita ejus est: & *Deuter.* XII. v. 23. *Vol.* 1. p. 726. b. *sanguis pro anima: hebr. sanguis est anima i. e. sedes animæ; quia sanguine alitur & servatur vita, ideo animam vocat vitam, animam cum carnibus i. e. carnem cum sanguine: GERHARDUS de Legibus Ceremonialib. & forensib. tr.* 2. cap. 1. §. 25. p. n. 381. Tomi tertii edit. in 4to ait: *carnis anima dicitur Levit. XVII. vita animantis est in sanguine, nim. quia sanguis est proximum animæ instrumentum, amicus naturæ filius, ut Avicenna loquitur.**

§. XIII.

Prosequimur hæc testimonia & præterea produci-  
mus CALVINUM in *Genes. IX. 4.* p. 68. non dubito, quia Mo-  
ses



*ses de anima locutus, sanguinem exegetice addiderit, quasi diceret carnem cum sua vita quodammodo vorari, ubi sanguine suo imbuta comeditur; quare vita & sanguis non ponuntur tanquam res diversæ, sed unum significant, non quod sanguis per se vita sit: Distincte porro ac nervose dicta illa OSIANDER interpretatur Levit. XVII. ad v. 16. p. 152. quamvis non tantum Cyprianus in sermone de Cæna domini scripserit: vita hominis licet habeat aliquam affinitatem cum sanguine, non tantum solo sanguine regitur, sed anima dat sanguini coloris & nutrimenti effectum, sicut & cæteris, quæ in corpore sunt propria distribuit officia & dividit motus & quasi talenta partitur, ipse etiam Lutherus rediderit des Leibes Leben, ut videatur prout dicendum, non tam animam ipsam, quam ejus motum & operationem esse in sanguine: nihilominus a posteriori des ribentes animæ præsentiam, noluerunt substantiæ informationem negare, sed indicare Cyprianus & Lutherus: pag. 153. varios significatus vocis שֶׁדָּה profert, & addit: hoc loco pro vita accipitur & sensus propositionis est: vita hominis consistit in sanguine, i.e. continetur & fovetur in sanguine simul etiam ac sanguis removetur, perit unio animæ cum corpore. Augustinus contra Manichæos dicit: exponenda sunt hæc verba de signo, quod signum animæ sit sanguis calidus: porro OSIANDER pergit: vox שֶׁדָּה significat & animam & animatum sive vivens, ut verti possit hoc modo: sanguis est animatus: In Deut. XII. ad v. 23 p. 113. dicit: in vocabulo anima est metonymia adjuncti pro subjecto & notatur sedes vel vehiculum animæ interprete Piscatore Herborensi disp. p. 531. claudit tandem OSIANDER pag. 116. b. Sanguis non est anima, sed sedes, sive vehiculum ejus ut Levit. XVII.*



v. 11. exponitur, est igitur in voce anima metonymia adjuncti pro subiecto. Accedat CALOVII commentatio Deuter. XII 23. non debere animam comedere cum carnibus i. e. carnem simul ac cum sanguine: & in Genes. IX. 4. Rabbi Saadiah & quidam non ignobiles Ebræorum magistros interpretantur, nam ut Moyses primam dixerit carnem cum anima non comedendam deinde semet exponens addidit i. e. cum sanguine: Sanguini datur nomen animæ. Non possumus non quin adhuc prioribus testimoniis annectamus Job. CLERICI interpretationem Genes. IX. vers. 4. videntur in banc sententiam delapsi posteriores Rabbini quod נפש anima possim vitam designet, quod si hic ita intelligatur sensus interdicti hic erit: modo ne carnem in ejus vita s. sanguine comedatis: neque hæc absurda est sententia, sed Loca Levitici & Deuteronomii, quibus simpliciter sanguine interdicitur atque effundi jubetur ostendunt hic ipsius sanguinis esum vitari, non membri ex animali vivo discerpti: Seu נפש vita sit, aut anima vitæ principium, perinde est: Quibus testimoniis probamus quod illi qui potentes & præstantes in sensus S. Codicis cognitione & interpretatione sunt, non probaverint, ipsum sanguinem animam, aut animam materiale in sanguine esse, sed quod anima eximium commercium habeat cum sanguine, ideoque sanguis valde necessarium instrumentum sit, pro vita producenda, introducenda, conservanda & distribuenda, ita ut sine sanguine anima in corpore subsistere & operari nequeat: quicquid enim de anima illa sensitiva aristotelica prædicatur, non enti, cujus alioquin nulla sunt prædicata, competit; nam præter notationem nominalem, omnia reliqua de tali supposita anima anigmatica & occulta sunt, quoniam

vere



vero de occultis non judicat Ecclesia, eapropter uberiora testimonia, pro nostra sententia militantia ex *Augustino*, *Hieronymo*, *Ambrosio*, *Aven Esdra* & recentioribus Theologis proferre non placuit: tantummodo adhuc coronidis loco allegamus *TIRAQUELLUM in XV. Legum Connubialium Glossa Prima Part. XV. num. 16. p. 213. tit. marginali: Sanguis pro anima sq. Franc. VALESIIUM Sacr. philos. cap. 5. pag. 79. WOODWARD in historia natur. telluris. GARMANNUM de mirac. mort. Lib. 2. tit. 7. §. 121. pag. 608.* Est itaque Sanctæ Linguae familiare animæ tribuere prædicata corporis (ubi sane alienum esset Sacro Codici imputare, quod distinctionem Peripateticorum inter rationalem, sensitivam & vegetativam animam acceptaverit) & corporeis subjectis attributa animæ, velut sanguini in S.S. adscribitur clamor, quod non nisi per *prosopopœiam* fieri potest vid. *GLASSII Rhetor. Sacr. Lib. V. cap. 9. num. 4. p. 1835. GERHARDUS in Genes. IV. GESNERUS in eund. locum qu. 6. p. 118. CALOVIVS, SCHMIDIUS, DANNHAUERUS & varii alii: quare stilo & harmoniæ S. Codicis conformes nos etiam in hac meditatione exhibemus: Et cum multa adhuc restant in præsentī Hæmatologia explicanda, limites tamen inauguralis Speciminis hic jubent quiescere: (haud enim infimæ dignitatis essent argumenta, an vita & vires in Sanguine hæreant & subsistant: quid judicandum sit de balsamo & spiritalcentia sanguinis, de virtute nutritiva & vivificante sanguinis juxta Harvei sententiam, de calore & calorifica sanguinis efficacia, an sanguis fermentationi obnoxius sit, quænam materiæ & qualitates plus vel minus sanguini proficiuæ aut nocivæ existant, quid & quo nexu causarum sanguis*



ad prudentiam conferat juxta HIPPOCRATEM *Lib. de flatib. §. 20. text. 3. & Lib. I. de morbis §. 28. text. 2. edit. Linden.*)  
ideo ne quid nimis, dum præter institutum præsens tractatio in paullo ampliorem disquisitionem excurrerit, agamus neve Lectori B. tædium creemus, præsentem considerationem abrumpimus, DEO Clementissimo devotissimas grates referentes, quod huic disquisitioni exarandæ prosperis annuerit successibus, cui reliquos nostros conatus ita consecramus, ut desideratus semper eosdem comitetur

F I N I S.



NOBILI



NOBILI AC CLARE DOCTO  
DOMINO CANDIDATO

S. P. D.

FRIDERICVS HOFFMANNVS.

Quisque fere medicinae sacris adductus genuina artis salutaris principia rectamque medendi rationem se adsecutum esse sibi persuadet; cum ipsi tamen haud perspectum sit, perpetuas fere inter medentes tam ratione theoriae quam praxeos regnare dissensiones atque discordias. Id quod etiam sua iam aetate CELSVS in praefat: operis sui eruditissimi annotavit: *non veras esse, inquit, medicorum rationes, patet ex eorum, qui in hac scientia disceptarunt, discordia.* Absit vero, quod ipsa ars, quae simplex perspicua & certissimis nititur principiis, controuersiarum, dubitationum & dissensionum causa iure meritoque possit haberi. Nam haec ipsa veritatibus



facti, quae in sensus incurrunt, siue accurate adnotatis & completis obseruationibus neque minus rationibus euidentibus certo nexu inuicem coniunctis est superstructa; cum potius omnium dissensionum & concertationum causa, in abusu philosophiae naturalis, qua abdita & plane imperscrutabilia quisque penetrare frustra conatur, sit quaerenda. Qua de causa quoque rectissime in fine iam laudatae Praefat: CELSVS monuit: *rationalem esse debere medicinam, instrui vero ab euidentibus causis, obscuris, non in cogitatione artificis, sed in ipsa arte reiectis.* Illud enim quod firmum, quod utile & necessarium in arte medica est, hoc simplex clarum, & cognitu haud difficile obseruatur, ac obseruationibus, anatomicis, chymicis, chirurgicis & practicis vnice continetur. Quare ego semper magni facio illos in re medica auctores, qui sepositis philosophicis subtilitatibus ac maxima parte ineptis, illa tantum, quae vsum habent & quorum ratio ex luculentis causis peti potest, pertractant. Quo nomine mihi semper maximopere placuerunt Helueti Ciues  
Tui,



Tui, inter quos Gesneros, Hildanos, Bauhinos, Muraltos, Zwingeros, Wepferos, Harderos, Bonetos, Plateros, Mangettos, Clericos, Sceuchzeros, Brunneros, Königios, Anhornios, Payeros, Halleros quam maxime veneror, qui missis inanibus theoriis ob praeclara in arte medica scripta & observationes immortalem sibi gloriam compararunt. Quorum magnorum virorum vestigia, **PÉR-EXIMIE CANDIDATE**, secutus, in academia tam Lipsiensi quam nostra Fredericiana ea potissimum studia, quae utilitatem foenerant, & ad artem exercendam necessaria sunt, summa industria & assiduitate, de qua & ego testis esse possum, excoluisti. Quos profectus, si eadem industria perrexeris, nullum dubium est, quin communem multorem salutem ulterius augere & perficere possis. Caeterum gratulor de specimine inaugurali & honoribus tibi collatis, qui ut in Diuini Numinis gloriam, parentum gaudium, aliorumque salutem prospere cedant atque feliciter eueniant ex animo precor.





